

DAFTAR RIWAYAT HIDUP

1. Nama Lengkap : Ahmad Sya'rani
2. Tempat dan Tanggal Lahir : Banjarmasin, 22 Januari 1977
3. Agama : Islam
4. Kebangsaan : Indonesia
5. Status Perkawinan : Kawin
6. Alamat : Jl. HKSN Komplek Surya Gemilang RT.20
RW.02 No.19 Blok H.a. Jalur I Kelurahan
Kuin Utara Kecamatan Banjarmasin Utara
Kota Banjarmasin
7. Pendidikan :
 - a. SDN Alalak Selatan 2 Banjarmasin Tahun 1989
 - b. MtsN Sultan Suriansyah Banjarmasin Tahun 1992
 - c. SMAN 8 Banjarmasin Tahun 1995
 - d. S1 Fakultas Dakwah Jurusan KPI IAIN Antasari Banjarmasin Tahun 2001
8. Orang Tua
 - Ayah : Abdul Murid (alm)
 - Ibu : Masfupah
 - Pekerjaan :
 - Alamat :
9. Saudara (Jumlah Sausara) : 1 Orang
10. Isteri
 - Nama : Hj. Mahmudah Herliani S.Th.I
 - Pekerjaan : Ibu Rumah Tangga
8. Alamat : Jl. HKSN Komplek Surya Gemilang RT.20
RW.02 No.19 Blok H.a. Jalur I Kelurahan
Kuin Utara Kecamatan Banjarmasin Utara
Kota Banjarmasin
11. Anak

Nama :Aghnia Salsabila, M. Maftuh Atho Mudzhar,
Alvina Mumtaza Asy-Sya'ira

12. Daftar Karya Ilmiah :
a. Skripsi Pandangan Mariam Jamilah terhadap Islam

Banjarmasin,
Penulis,

Ahmad Sya'rani



SYAIR SYAIR SUFISTIK

Dokumentasi Rekaman Syair-syair Madihin Anang Syahrani Tahun 2009
s/d 2011 Disiarkan Pada Setiap Hari Rabu dan Sabtu di Program Bunga
Rampai Madihin LPP RRI Banjarmasin Diketik Menjadi Naskah Oleh Hery
Purwanto Staf PRO 4 LPP RRI Banjarmasin



Amun pian hidup handak tanang
Kada mauk alias jadi pusang
Bulik akan awan nang maha tarang
Nang mambari razaki malam awan siang
Mambari titik pada darah nang habang
Baisian mata panjanak hagan mamandang
Baisian talinga hagan mandangar suara nang bagalumbang
Baisian Muntung Suara Bakumandang
Baisian tangan nyaman hagan mamagang
Baisian akal baik wan buruk ditimbang
Baisian Hati tumbuh sifat panyayang
Alamat diri parak jalan nang tarang
Patunjuk Maha Cahaya datang menjelang....

Kalu Allah dalam diri sudah parak
Hati lapang kada pina sasak
Babungas parilaku atawa babungas akhlak
Ma itihi dunia sakilas panjanak
Baibadah kada parlu awan urang diurak
Minta tangguh pander pina baagak
Parnum diri batin nang rusak
Barasihi awan dzikir di hinak
Bukan tiupan sakadar babinak
Namun pujian asal tanah balambak
Derajat diangkat karena terpuji akhlak

Ibadah kita kada sanggup mambayar
Nang Maha Rahman cahaya mamancar
Siang wan malam sajadah di ampar
Kada kawa baucap bapander lancar
Kuasa Allah Kalam diajar
Hanya baumpat kapal balayar
Kamudi dipingkut bajalan malancar
Batiup angina takambah layar
Hanya baumpat duduk salasar
Manyaksiakan nang maha besar
Bulik ka asal napa nang diantar
Pintu Mahabbah tarbuka lebar
Makrifat simpun hati pun basinar
Hamba pun sirna batin bergetar
Tiada kalam hanya Allahu Akbar

Asal diri insan banyu satitik
Itu partanda awal nang baik
Kada basuara atawa balirik
Tasusun awan unsur nang apik
Batitip nafsu menguji nang baik
Iman bakuat darajat banaik
Dzikir dan pikir semakin asyik
Buang nang jahat kikis nang lanik

Malihat kehidupan samakin bingung
Kahandak nafsu sattinggi gunung
Baulah kindai baulah lumbung
Supaya banyak harta ditampung
Padahal hanya sasuap masuk kamuntung
Kada sadar diri nang sumbung
Ibadah lalai sajadah tagulung
Kalumpanan awan diri manjadi linglung
Zakat ditahan rigat karungkung
Sumbahyang koler waktu taliung
Puasa luput alasan lambung
Ini ciri urang nang buntung
Di yaumilmahsyar kada kawa balindung

Amun kaya nangitu banyak baingat
Singgah kadunia hanya satumat
Sahibar mamandang sahibar malihat
Kada kuasa amun kadada rahmat
Rahmat Allah datang siap saat
Kada kawa dihitung kada kawa dicatat
Hanya dirasa bukan hagan dilihat
Tapi Nampak banar cahaya rahmat
Amun sampai jalan makrifat
Takarinyum kalakuan manusia malihat
Bulik ka asal banyakka bataubat

Panarang jalan pian harus tahu
Ujar urang banjar artinya pinandu
Kada lain harus baisian ilmu
Kamana batakun manuntut ilmu
Kapangajian kawadah tuan guru
Sasuai tuntunan syariah nang berlaku
Jangan pina paragah tahu
Kalu dadangaran kamana baguru
Lalu akhirnya jadi sabuku
Bingung kamana arah manuju
Dasar pamulaan barasihi kalbu
Parbaiki akhlak parbaiki parilaku
Kalihatan nang mana intan nang mana batu
Amun intan harganya tinggi bermutu
Wadahnya bagus diandak di tuku
Amun batu dijajak urang nang lalu
Tantu batakun nang ahli intan wan batu
Supaya kita kada sampai tartipu
Jangan di anggap si angin lalu
Parkara gasan bulik kaji dahulu
Iman wan Taqwa tajak pian didalam kalbu
Ibarat bakayuh pian jalas basangu
Nyaman manyusur sungai kahulu
Ada arah jalan nang dituju
Khusnulkhotimah mahabbah awan Tuhanku

Malihat zaman nang sudah mauk
Nafsu jadi raja akal pun tunduk
Kadada maras di hati marasuk
Hati batagar iman pun lintuk
Awan dunia samakin mabuk
Basasimpun harta batumpuk-tumpuk
Urang miskin kakurangan lauk
Urang sugih kakanyangan duduk
Urang bailmu pander malibuk
Urang awam kamana manunjuk
Urang badagang hujungan satangguk
Amun sudah garing siawak ramuk
Hanyar tabayang sitanah nang luluk
Napa di bawa tabala nang jabuk
Mungkar wan nangkir datang mancatuk
Hancurlah sendi situlang rusuk
Sadar lah diri nan lagi mabuk
Sudah talambat awak nang mumuk
Kanapa dahulu nafsu nang sibuk
Kamana ilmu di majelista'lim musti duduk
Baibadah badahulu iman dirasuk
Parak banar ujar urang di palupuk
Bukan sakadar badiri awan baduduk
Kehadiran cinta sampai dilubuk
Awan sang Rahman asyikwama'syuk

Walaupun hidup hanya sakilas
Ibarat sinar hanyalah bias
Cahaya putih nangkaya kapas
Sadikitpun kada kawa mambalas
Banyak karunia ditarima limpas
Kada marasakah manarik nafas
Masuk kedalam diri nang maras
Kada badaya jangan marampas
Marasa harat diri nang bahias
Sara bakurang saraba terbatas
Suara batin dangarlah badadas
Haragu diri sifat nang ikhlas
Insya Allah malihat cahaya nang jelas

Perintah Allah jelas terlihat
Rasulullah membawa di malam mi'raj
Sehari semalam tujuh belas rakaat
Semua terhimpun di dalam sholat
Pendakian diri jalan ma'rifat
Indahnya ma'rifat zahirnya syariat
Jangan tasalah paham di dapat
Pada akhirnya paham jadi tersesat
Salah mamaham salah pulang pendapat
Karena dadangaran mangaji ma'rifat
Binasa diri tasasat dunia akhirat

Indahnya batin mangaji tasawuf
Awal bermula istilah roja wan khauf
Lalu mahabbah datang cinta manyusup
Hati bicara muntungpun takantup
Betapa bungas sebenarnya hakikat hidup
Suara batin pun pina sayup-sayup
Banyu ma'rifat datang mengalir manculup
Wahai kekasih hatiku jadi gugup
Tabuka tirai lawas pina takantup
Rigatnya batin yakin ulun jadi redup
Bacabur maksiat ulun tasarusup
Datang kekasih cahaya pun hidup
Nikmat terasa diri ulun majdzub
Magin baasyik ibadah taqarrub
Al-quran dibaca menjadi mahbub
Terdengar Kalam Tuhan huruf demi huruf
Banampak feel manggawi nang ma'ruf
Ibaratkan kambang sulasih nang kudup
Balum malarak rahasia diri takantup
Harum baunya samarbak mahirup
Asal harum nyaman ulun rauf
Hati ulun bapander bibir takantup
Napakah ini rahasia nang maha hidup
Atawa rahasia diri gaibul guyub
Sahingga tanang ulun mamahami makna hidup

Asal diri manusia satitik air
Tiupan cinta manyongsong hadir
Anugerah dari nang maha kabir
Walaupun banyak bamacam-macam kalir
Kada kawa mahindar awan katatapan takdir
Doa ikhtiar dalam hati selalu terukir
Bukan hanya ucapan hiasan bibir
Hanya nama pian selalu hadir
Tasbih tahlid wan jua takbir
Hembusan nafas selau bergilir
Kadang kahulu kadang jua ka hilir
Jukung makrifat di sungai mengalir
Gelombang nafsu dihaluan jukung manyambur air
Mambasahi diri syariat nang jahir
Kayuh tarus hadapi janganlah gair-gair
Jangan sampai marapat ka pinggir
Amun ka pinggir musuh datang manguir
Tajak jangkar tauhid baisi zikir
Zikir batin manghalau musuh di usir
Zikir zahir ucapan di bibir
Zikir af'al akhlak parilaku manis bakalir
Sudah mesra perbuatan batin wan zahir
Fana diri awan nang ampun taqdir
Manisnya iman wan taqwa Tuhan selalu hadir
Manuju jalan Hakikat harus ada pandamping

Syaratnya barasih caramin hati nang bening
Cahayanya putih bukan hirang wan kuning
Supaya lurus parlu guru pambimbang
Mamaham saurangan akal jadi miring
Ingat ulun kisah sarumpun paring
Ujar maulana Rumi sebuah seruling
Padahal hanya sabatang paring
Dibari lubang bunyinya mandanting
Nang mandanggar himung takurihing
Tiupan angin naik darajat paring
Batambah ngaran hanyar yaitu suling
Amun kada ditiup hilang bunyi suling
Ngitu gambaran ingatlah rumpun paring
Suling di andak zahirnyalah paring
Kuasa arrahman kada kawa manyaring
Kada kawa mambayar awan rakaning
Walaupun sujud di malam nang hening
Paluh mangalir sampai ka kening
Hanya badan zahir nang garing
Supan maminta karena tarlalu sering
Baik bajalan atawa awak tabaring
Hanya ikhlas pintu nang cahaya bening
Rahmat Allah semesta alam nang takuliling
Dunia wayah ini pina campur daur
Ngalih banar mancari jalan nang bujur

Hanya agama dipingkut sasuai jalur
Hiasi diri budi pakarti nang luhur
Jalani syariat batin nang jujur
Hakikat diri insan tanah sabalur
Tinggal batanam bibit di tabur
Tanaman iman pupuknya subur
Akar di hati jauhi sifat takabbur
Jaga lisani jauhi pander nang caur
Bungasi diri awan sifat nang jujur
Gaduh sifat ikhlas banyak basyukur
Tiupan ilmu wan hikmah datang manampur
Mencari wadah diri nang luhur
Ilmu rahasia ilmu nang hudhur
Jauhi maksiat parilaku kutur
Maulah iman didada manjadi luntur
Musuh pun datang mahaur-haur
Banyak panuntut manjadi tacabur
Si urang awam kisah bapitutur
Salah makna pahampun kufur
Fasik dan zindik batulis kafur
Rahmatmu kekasih nang ulun ulur
Salah langkah ulun salah jalur
Na'udzubillah wahai sang ghafur
Inbat Sabda junjungan Rasulullah
Hakikat diri malihat saulah-saulah

Jangan dipaksa kalam bermadah
Amun kada kawa jangan manyalah
Mata zahir tadinding wilayah
Kada sanggup manambus ilallah
Tazkiyatunnafs kunci ba ibadah
Bukan hanya duduk ma ungu di sajadah
Bukan muntung baucap manyumpah
Bukan akal nang manyusun madah
Bukan hati sultanul jasmaniah
Bukan ruhani di suruh pindah
Tapi meliputi akhlakul karimah
Takhallaqu bi akhlaqillah
Inilah paham ilmu yang indah
Sesuai anjuran wan Sasuai sunnah
Amun sudah pada fana fillah
Kada kabaikan nang hamba ulah
Kecuali izin Rahman-mu ya Allah
Kemanapun ulun manuju tempat dan arah
Diri ulun kada kawa basimbah
Hanya pian tujuan dunia akhirah
Harapan ulun maghfirataw warahmah

